

Inatsisartut Suleriaasianni § 33, imm. 3, nr. 1 malillugu Nunat Avannarliit Killiit Siunnersuisoqatigiiffiannut aallartitat siulittaasuata aalajangiiffigisassatut siunnersuut tulliuuttoq saqqummiuppaa:

Nunat Avannarliit Killiit Siunnersuisoqatigiiffiata kaammattuutitut aalajangersagaanik nr. 1/2023-mik Inatsisartut ilaliinissaannik siunnersuut:

Nunat Avannarliit Killiit Siunnersuisoqatigiiffiata Islandimi, Kalaallit Nunaanni Savalimmiunilu naalakkersuisunut kaammattuutigaa

-Immamik nerisassaasivittut atukkatsinnik nunani avannarlerni killerni nunat suleqatigiillutik qanoq illersuisinnaanerannut ataatsimut isiginnilluni pilersaarummik ataatsimoorussamik aallartitsinissaq nunani avannarlerni killerni naalakkersuisut siulittaasuisa oqallisigissagaat

-pisuussutinik maangaannartitsinissaq pinngitsoortinniarlugu, inuussutissanik pilersuinerup isumannaatsuunissaa qulakkeeriarlugu, mingutsitsineq akiorniarlugu, Issittup sakkussakillisaaffiguarneqarnissaa aammalu uumasut assigiinngitsut amerlassusiannik imaanilu pissuseqatigiit ataqatigiinnerannik illersuiniarlutik nunani avannarlerni killerni naalakkersuisut siulittaasui anguniagaqarfiusumik suliaqassasut

- nunani avannarlerni killerni naalakkersuisut siulittaasui Atlantikup avannarpasisuata nunarsuarmi imartatut piujuartitsinissamik tunngaveqarnerpaatut inissisimalernissaanik nunap immikkoortuiniinnaanngitsoq aammali Issittumi nunanilu tamalaani suliniutiginnillutillu anguniagaqassasut aammalu tamatumani siuttuussasut

(Aallartitat siulittaasuat Doris J. Jensen)

Tunngavilersuut:

Imaq nunani avannarlerni killerni nunat nerisassaasivigaat. Taamaattumik immap illersorneqarnissaata peqqissaarunneqarnissaa pingaaruteqarpoq. Pisuussutit immap uagutsinnut tunniuttagaasa maangaannartinneqarnissaat pinngitsoortinniarlugu immamik illersuiniarluni suliniutit atuutereersut ingerlatiinnarneqarnissaat taakkulu pillugit suleqatigiinnerup annertusarneqarnissaa pingaarutilerujussuvoq.

Silap pissusiata allanngoriartornera nunarsuup affaani avannarlerni ersarippoq annertooujussuarmillu uagutsinnut sunniuteqarluni. Immap kissassusaata allanngornerata, immap searnarnerulernerata mingutsinneqarneratalu imaq uagut nunarsuup ilaani tassaniittut ukiuni untritilikkuutaani nerisassaasivipput sunnerpaat. Nunarsuup ilaani najukkatsinni inuussutissanik pilersuinerup qulakkeerneqarnissaa nunatsinni inuiaqatigiinnut tunngaviulluinnartumik pingaaruteqarpoq.

Issittumi allannguutit umiarsuarmik angallaffinnik nutaanik pilersitsipput, issittullu imartaani umiarsuarmik angallattoqarnerulernissaanik nassataqassallutik. Taamatut angallanneq mingutsitsisoqaratarsinnaaneramik

allaallumi mingutsitsilluni kukkussuteqarnikkut ajutoornernik nassaqatarsinnaavoq. Aammattaaq Issittup sakkussakillisaaffiguarneqarnissaata ingerlatiinnarneqarnissaa aammalu ilaatigut nunarsuup immikkoortuani innuttaasunik isumannaallisaanissaq atugarissaartitsinissarlu, taakkulu peqqissumik avatangiiseqarnissaat eqqarsaatigalugit taamaattoqartuaannarnissaa anguniarlugu suliniuteqartoqarnissaa pingaaruteqarpoq.

Aalisagaqassutsimut piujuartitsinissamik tunngaveqarluni pisassiissuteqartarneq pillugu suleqatigiilluarnitta ingerlatiinnarnissaa pisariaqartipparput. Tassunga atatillugu savalimmiormiut, kalaallit islandimiullu ataatsimut soqutigisaqarnertik pissutigalugu suleqatigiinnissaat pingaaruteqarluinnarpoq. Uumasut assigiinngisitaarnerannik illersuineq nalitsinni unammilligassat annertunersaraat, tamatumalu peqatigisaanik inuiaqatigiisugut siumukarsinnaanissatsinnut aalajangiisuulluni. Tamatuma ilaa pingaarutilik tassaavoq imaani pissuseqatigiit ataqatigiinnerannik illersuinissaq, aalisakkanik pisassiissuteqartarneq nunamilu atortussianik atorluaaneq ilanngullugit eqqarsaatigalugit.

Suliassaqarfik taanna nunani avannarlerni killerni nunat siuttuuffigalugu suliniuteqarfigisinnaasaat angusaqarluarniarlutillu anguniagaqarfigisinnaasaat. Tamatumani nunap immikkoortui avannarlerni killerniittut kisiisa eqqarsaatiginagit, aammali Issittoq tamaat, taamaalillunilu nunarsuaq tamaat eqqarsaatigalugu.